

Boh raeuz bingh sim lingz,
Ce lwgcing ndwi ganq;
Bi cai gyaep bi nanz,
Mbouj hanh cih gag daengz.

Gyouz aeu va namzcej,
Daengz ngoenzneix boiz cingz;
Boh raeuz bingh sim lingz,
Ce lwgcing ndwi ganq.

Goq ganq boh aeu ndei,
Mbouj ngawz boh biegan;
Bi cai gyaep bi nanz,
Mbouj hanh cih gag daengz.

Boh yietyuk aen mbonq,
Dwk baengzbonq sam caengz;
Lwg hop naj hop laeng,
Cib faen mbouj ndeiyouq.

Naengh miz lwg caezhangz,
Banh gyaranz gaxgonq;
Boh yietyuk aen mbonq,
Dwk baengzbonq sam caengz;

Boh duenx bae seizneix,
Fanh seiq mbouj doxraen;
Lwg hop naj hop laeng,
Cib faen mbouj ndeiyouq.

Seizneix boh raeuz dai,
Vah geijlai gyonj daengq;
Ce dieg ninz dieg naengh,
Haethaemh baenzlawz lumz?

Souj sam bi hauq fuk,
Daengq lwg cuengq caeuq ngaiz;

Seizneix boh raeuz dai,
Vah geijlai gyonj daengq.

Boh raeuz haeuj yaemgan,
Lwglan fouz dieg baengh;
Ce dieg ninz dieg naengh,
Haethaemh baenzlawz lumz?

Boh baenz sien bienqvaq,
Dai bae naj nanzlumz;
Veiz daihhanz daeuj cumz,
Lumz lwgcing ndwi ganq.

Boiz aencingz lauxboh,
Byoq gimngaenz caiz max;
Boh baenz sien bienqvaq,
Dai bae naj nanzlumz.

Lwg roxyiuj rox ngeix,
It seiq mbouj ndaej lumz;

Veiz daihhanz daeuj cumz,
Lumz lwgcing ndwi ganq.

Boh raeuz dai gvaqsei,
Daengq beixnuengx lwglan;
Saet mingh haeuj yaemgan,
Vut gyaranz ndwi ganq.

Bae ndek lwg ndek cing,
Boh hwnj din seizneix;
Boh raeuz dai gvaqsei,
Daengq beixnuengx lwglan.

Dai haeuj im sei loh,
Ndek gya hox mbanjranz;
Saet mingh haeuj yaemgan,
Vut gya ranz ndwi ganq.

Boh cix ndwi gyaenz dai,
Vaih gwnzmbwn cauz bouh;
Cojcoeng roengzdaeuj coux,
Bae imfouj cauxranz.

Haep bak dai ce lwg,
Haet doiq fuk doiq myaiz;
Boh cix ndwi gyaenz dai,
Vaih gwnzmbwn cauz bouh.

Baek daeuj roengz diemjmingz,
Meiz gim cix nanz rouh;
Cojcoeng roengzdaeuj coux,
Bae imfouj cauxranz.

Fwen Haeujfaex

入 榔 歌

□ Vangz Fungmingz/黄凤明

Lijyoz Auyinvei

里 约 奥 运 会

□ Vangz Gozgvanh/黄国观

Beix:
Gij ginhbaiz daihgouj,
Nuengx naeuz bouxlawz ndaej?
Dwg danhangh aen lawz?
Nuengx gangj hawj dou dingq.

Nuengx:
Hangh 69 goenggaen,
Gingznaek caen hwnjheiq,
Dahsau Yang Yenmeiz,
Dawz ginhbaiz haeuj fwngz.

Beix:
Daihcib aen ginhbaiz,
Nuengx cai bouxlawz ndaej?
Dwg danhangh aen lawz?
Gangj hawj beix roxndeq.

Nuengx:
Binghbanghgiuz danhdaj,
Guekgya raeuz cungj hingz,
Dahsau heuh Dingh Ningz,
Dwk hingz ndaej ginhbaiz.

Nuengx:
Beix gaenq cam baenzlai,
Wnggai daengz gou cam,
Baenz rap rox baenz ram,
Cam mwngz beix aeu hoiz.

Beix:
Cam Auyin ginhbaiz,
Nuengx wnggai roxndeq,
Cam gaiqlawz gaiqde,
Beix nauqnadeq hoiz mwngz.

Nuengx:
Cib'it aen ginhbaiz,
Beix cai bouxlawz ndaej?
Dwg danhangh aen lawz?
Gangj hawj nuengx roxndeq.

Beix:
Sai binghbangh danhdaj,
Guekgya raeuz ak lai,
Maj Lungz baez hwnjdaiz,
Ginhbaiz ndaej daengz fwngz.

Nuengx:
Gij ginhbaiz cibngeih,
Beix naeuz bouxlawz ndaej?
Dwg danhangh aen lawz?
Beix gangj hawj gou dingq.

Beix:
Ngeihcib aen goengleix,
Sai doxbeij gingcouj,
Vangz Cin daengz itnduj,
De couh ndaej ginhbaiz.

Nuengx:
Gij ginhbaiz cibsam,
Cam beix bouxlawz ndaej?
Dwg danhangh aen lawz?
Beix gangj hawj gou dingq.

Beix:
Dahsau Gungh Ginhgez,
De caeuq Cungh Denhsij,
Ndaw ciengz caij danhci,
Lij ndaej aen ginhbaiz.



Heiqfoux 《Byaraiz》. Cinz Fungcenz ingi

Gag Naeuz

自 言

□ Mwz Sungh/麦 嵩

Boux vunz laebceiq ok ndaw bya,
Hwnj sang ngonz haij hai da gou.
Raemx mbwn doengz saek roeghaijhouh,
Ranzmbanj gizlawz yawj yienghneix.
Roeg'enq bibi namzbaek mbin,
Ngonz doh dah bya Cungguek raeuz.
Duzgaeq daihdaih youq suen daeuq,
Mboujcaengz raen ndaej biengh fwj ndeu.
Lwgmbauq sam gauj hwnj Bwzda,
Haengguh guh hwnj Sinhdu Nghfangh.
Bouxcoz daraeh ceiqheiq sang,
Gaenx buek cauh ndei Dauzbauj Vangj.
Danghnaeuz mbouj byaij hwnj dingjbya,
Baenzlawz raen ndaej diendeih gvangq.
Seizneix gag naeuz hoj nanz gangj,
Daengzcog rox neix miz vanhaemz.